

## Mapangahasong ipasubsub ang gerilyang pakiggubat ug tibuok-kusog nga suklan ang pasistang rehimeng US-Duterte! Iasding ang gubat sa katawhan sa mas taas pang ang-ang!

Mensahe sa Komite Sentral sa Partido Komunista ng Pilipinas sa okasyon sa ika-50 nga anibersaryo sa Bagong Hukbong Bayan

**G**inasaluduhan ug ginapaabot sa Komite Sentral sa Partido Komunista ng Pilipinas, kauban ang katawhang Pilipino ug tanan nilang rebolusyonaryong pwersa, ang pinakamilitanteng pagtimbaya sa mga maisugon nga Pulang kumander ug manggugubat sa okasyon sa ika-50 nga anibersaryo sa pagkatukod sa Bagong Hukbong Bayan (BHB).

Saulugon nato ang mga kadaugan nga natigom sa lima ka dekadang pagpaasding sa gubat sa katawhan, lakip ang mga nakab-ot sa nilabay'ng katuigan sa armadong pagsukol sa bangis nga atake sa pasistang rehimeng US-Duterte.


Parangalan nato ang tanang bayani ug martir sa gubat sa katawhan nga naghalad og kinabuhi alang sa rebolusyon. Ilhon usab nato ang tampo sa tanang beterano nga nagserbisyo sa BHB ug padayon karong nagaserbisyo sa rebolusyon sa laing paagi. Dili makab-ot ang mga kadaugan sa nilabay'ng 50 ka tuig kung wala ang ilang mga sakripisyo. Hangtud sa hangtud nga maukit ang ilang mga pangalan sa bantugang kasaysayan sa Pilipinhong pakigbisog. Inspirasyon ang ilang kinabuhi aron abagahon pa nato ang mga bug-at nga tahas.

Hugot usab natong saludahan ang liboan ka Pulang kumander ug Pulang manggugubat sa BHB, ang mga karaan na ug bag-ong rekrut. Puno sila sa pangandoy nga panalipdan ang masa ug iasding ang pangandoy sa katawhan. Hilabihan sila ka madasigon aron iasding ang

armadong pakigbisog. Mga modelo sila sa kadasig ug pagka-dili-makikaugalingon.

Ginadut-an sa nagkagrabeng krisis sa semikolonyal ug semipyudal nga nagaharing sistema ang panginahanglang iasding ang nasudnon-demokratikong rebolusyon. Labaw pa kining gipataw sa pagpangabuso sa rehimeng Duterte sa gahum, korapsyon, kaylap nga pagpanglapas sa katungod-tawo, dinaghang pagpamatay, krimen sa gubat, pagpakaitoy sa imperyalismong US, mapatuyangong langyaw'ng pagpangutang, pabug-at nga mga buhis ug pagbaligya sa bahandi ug patrimonya sa nasud.

Si Duterte ang hulagway sa kadunot sa tibuok nagaharing sistema. Hilabihang sosyo-ekonomikong pagantos ang hatud sa iyang mga pali-siyang kontra-katawhan, kontra-nasyunal ug kontra-demokratiko. Gisugdan niya ang bangis nga gyeong giduyugan sa abuso ug pasistang kapintas. Sa kahakog sa dugang nga gahum, desidido siyang ipabarog ang usa ka pasistang diktadura aron palanaton ang pagha-



ring dinastiko ug panalipdan ang tibuok nagaharing sistema pinaagi sa dayag nga kapintas.

Nag-antos ang lapad nga masa sa katawhang Pilipino sa nagkagrabeng kundisyon sa krisis ug walay laing kapilian kundili ang iasding ang rebolusyonaryong pagsukol sa masa ug armadong pakigbisog aron tapuson ang ilang nagkagrabeng kahimtang. Nagamugna ang krisis sa nagaharing sistema og kahimtang nga mas paborable alang sa paspas nga paglambo sa mga rebolusyonaryong pwersa. Tungod sa tiranya ug paghari sa teror ni Duterte, nagkadaghan ang natukmod nga mosuporta ug mosampa sa BHB.

Padayon nga nagabwelo ang BHB sa tibuok nasud aron ipataas ang ang-ang sa gubat sa katawhan sa moabot nga katuigan. Nagalun-

sad kini og mga taktikal nga opensi-ba, ginakumpiska ang armas sa kaa-way, ug nagarekrut ug nagabansay sa mga bag-ong Pulang manggugubat. Ginapatigbabawan sa BHB ang todong-opensiba sa reaksyunaryong pwersa ilalum sa deklaradong tumong ni Duterte nga tapuson ang armadong pagsukol. Ilalom sa pag-pangulo sa Partido, determinado ang BHB nga maangkon ang mas dagkung kadaugan sa mga moabot

nga katuigan.

Tungod sa grabeng pagbara sa ekonomiya, nahulga nga matay-og ang tibuok nagaharing sistema sa Pilipinas, kadungan sa padayon nga pagkalumpag sa kalibutanong sistemang kapitalista sa malahutayong depresyon nga, sa pagkakaran, patiu-rok sa wala pay susama ka lalom nga krisis sa pinansya. Ginaanak sa monoponyong kapitalismo ang pinakagrabeng porma sa pagpangdaug-daog

ug pagpahimulos sa masang anakpawis sa tibuok kalibutan. Mas nisamot ang nagkagrabeng indigay sa mga imperyalista alang sa pagkontrol sa natad sa patigayon ug pamuhunan.

Sa pagkab-ot og mas daghang kadaugan, nakatampo ang BHB nga hataga'g inspirasyon ang mga dinaug-daog ug pinahimuslan sa tibuok kalibutan nga mag-armas ug maglunsad og rebolusyonaryong pagsukol batok sa imperyalismo ug tanang reaksyon.

## Nagapadayon nga pangkalibutang kapitalistang krisis ug nagkalalom nga mga kontradiksiyon

GAKINAIYA ANG KASAMTANGANG KAHIMTANG sa kalibutan og dili resolbadong kapitalistang depresyon nga nagapadulong sa nagkagrabeng pagpangdaug-daog ug pagpahimulos; ingonman sa nagkagrabeng inter-imperyalistang kontradiksiyon tali sa dagkung gahum, kung asa nagapanghingusog nga solong maghari ang imperyalismong US nga nagtukmod og tensyon ug antagonyismo sulod sa nagatunhay nga multipolar nga pagkahan-ay.

Binilyong mamumuo ug mag-uuma sa tibuok kalibutan ang nagsagubang sa dili maantos nga kahimtang. Nagasukol sila ug hilabihan ka andam nga motubag sa panawagan alang sa rebolusyonaryong pakigbisog ilalum sa bandera sa tinuod nga mga partido komunista.

Taliwala sa nagapadayon nga istagnasyon, nabalaka bisan ang mga imperyalistang ahensya sa hulgang bagyo sa ekonomiya. Nagpahimangno silang malumpag ang internasyunal nga sistema sa pi-

nansya tungod sa kadaku sa pangkalibutang utang. Tungod sa sobrang produksiyong kapitalista, nagkagrabe ang kontradiksiyon tali sa dagkung imperyalistang gahum sa hisgutanan sa mga pagkahan-ay sa patigayon ug ekonomiya.

Gisuyop sa istagnasyon ang ekonomiya sa US ug Europe. Padayon nga nagatiurok ang US sukad sa pagkahimong pinakadakung ekonomiya sa kalibutan, atubangan sa nagahagba nga tubo sa mga nag-unang korporasyong Amerikano. Ginapakita sa mga surbey nga mihinay og 1.2% ang pagpamuhunan niadtong milabay'ng tuig. Gipas-an sa US ang \$22 trilyong utang.

Bag-uhay lamang nga gitaho sa Germany ang paggamay sa produksiyong industriyal, human nakasagubang og nagkagamay nga demand ang mga nagahimo og kotse ug nagplanong magkibhang sa mga mamumuo. Anaa sa resesyon ang Italy. Nagsagubang ang Britain sa pagkabungkag sa produksyon tungod sa pag-atubang niini sa kawalay-kasiguruhan taliwala sa walay tino nga pagkahan-ay sa patigayon ug ekonomiya

alang sa malahutayong tinubdan sa kahimanan ug hilaw nga materyales oras nga pormal kining mobiyas sa European Union.

Nagakurog ang tuhod sa kapitalistang kalibutan sa ginadahom nga paghinay sa ekonomiya sa China, nga opisyal nga nagrehistro og 6.6% nga paglambo niadtong nilabay'ng tuig, pinakahinay sa nilabay'ng 30 ka tuig. Taliwala sa pagkibhang og buhis ug uban pang pangpalagsik nga lakang sa pinansya, nihiyos ang manupaktura sa China niadtong 2018 atubangan sa padayon nga nagkadakung imben-taryo sa dili-mahalin nga komodite, susama sa pagtiurok sa halin sa kotse sa nilabay'ng tuig, nga pinakaunang higayon sa duha ka dekada. Napig-ot usab kini atubangan sa nagkagrabeng bangi sa patigayon sa US, kung asa nagpaingon ang 20% sa eksport niini. Nihagsa og 27% ang merkado sa China niadtong katapusan sa 2018. Nagkagamay usab ang demand sa China alang sa import, nga bug-at ang epekto sa mga nasud nga hikot sa semi-manupaktura sa mga komodite nga pang-eksport.

Sa desperasyong patigbabawan ang istagnasyon sa ekonomiya, gi-yugyog sa US ang nagatunhay nga mga kasabutan sa patigayon ug pamuhunan. Nagpahamtang kini og taripa sa mga komodite gikan sa China aron iduso kining mag-import og dugang nga soybean ug uban pang komodite gikan sa US aron makibhangan



Espesyal nga Isyu | Marso 29, 2019

 @prwc\_info

 groups/prwcnewsroomv2

 cpinformationbureau@gmail.com

Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas

ang surplus sa patigayon sa China nga mikabat sa bag-ong pungkay nga \$323.3 bilyon niadtong nilabay'ng tuig, ug aron iduso ang China nga mas paluagon ang mga balaod sa langyaw'ng pamuhunan ug tangtangan ang rekisitong susihon ang teknolohiya ug mga subsidyo sa estado. Wala pay natibuok nga kasabutan sa pamatigayon ang tulo ka bulang negosasyon sa China ug US sukad Disyembre.

Gideklara usab bag-uhay lang sa gubyernong US nga usa ka "hulga sa nasudhong seguridad" ang pag-import og mga sakyanan human gianunso ang planong magpahamtang og 25% nga buhis sa mga kotse gikan Europe, ilabina gikan sa Germany, sa tinguha nga hataga'g proteksyon ang mga nagamanukpaktura og kotse sa US. Mga bangi usab sa pamatigayon ug pamuhunan ang naa sa kasing-kasing sa pagkabig sa United Kingdom nga makatibuok og kasabutang Brexit.

Niadtong Enero, gideklara ni Trump ang "national emergency" ug giangkon ang gahum nga gamiton ang \$5.6 bilyon alang sa pagtukod og pader sa utlanan sa US-Mexico aron kuno pugngan ang ilegal nga pagsulod sa US sa mga imigrante, usa ka lakang nga gisupak sa kongreso sa US. Isip reaksyon sa pagkusog sa pasismo ug palisiyang ultra-tuo sa gubyernong Trump, mas nagsaba-saba ang mga liberal, lakip ang pipila ka mga Democrat sa kongreso sa US nga nagbahad nga sugdan ang impeachment ni Trump.

Tungod sa istagnasyon sa ekonomiya sa US, natukmod kining mas iduso ang ultranasyunalismo ug gahum hegemoniko, nga nagapainit sa kontradiksyon sa mga karibal nga gahum. Nagaresulta kini og mga palisiyang pasista ug ultra-reaksyunaryo. Ginaila sa uban ang mga lakang nga unilateral sa US isip bira sa multilateralismo. Gibabagan sa Russia ug China ang dayagang suporta niini sa pakyas nga pag-ilog

sa gahum sa Venezuela niadtong Enero, nga padayon nga nagasupporta sa gubyernong Maduro. Pakyas usab ang US nga hingpit nga ipahamtang ang mga pang-ekonomiyang sangksyon o masilitong lakang sa pang-ekonomiya sa Iran. Ginapuna sa mga karibal sa US ang lakang niining makadaot sa European Union, ingonman ang pagduso niining ipalingkod ang usa ka maki-taripa nga Amerikanong upisyal aron mangulo sa World Bank.

Niadtong Pebrero, mibiya ang US sa Intermediate Range Nuclear-Force (INF) Treaty, usa ka kasabutan nga gitukod kauban ang Russia niadtong 1987 aron limitahan ang katakus sa mga armas nukleyar. Nakatak dang mawad-an og bisa ang tratado sa unom ka bulan (Hulyo). Dugay na'ng plano sa US nga talikdan ang tratado aron mapapasas niini ang paghimo og bag-ong mga armas nukleyar sa pakiglumbaay sa mga karibal niini nga magpakusog og mga armas sa tinguha nga ipabilin ang iyang pangkalibutang pagharing militar.

Nagaapas ang ubang mga imperyalistang gahum nga ipataas ang ila-ilang kusog militar. Gianunso sa China ang planong dugangan ang gasto aron labaw'ng pakusgon ang iyang militar lakip ang paghimo og mga aircraft carrier nga de-nukleyar aron labwan ang kusog sa US sa Pacific. Nag-anunso usab ang Japan nga sa mosunod nga lima ka tuig, usbawan niini ang kanhing gasto sa ginapalit niining mga kahimanang militar sa US. Gitukod usab sa mga upisyal pangdepensa sa Europe ang Europe Defense Fund, ang Permanent Structured Cooperation ug ang European Intervention Initiative sa tumong nga minusan ang pagsalig sa US. Magkaubang gi-endorso sa France ug Germany ang konsepto sa pagtukod og usa ka "European Army."

Tungod sa indigay sa dagkung gahum, nagkakusog ang hulga sa gyera ug malangkubong pagpuong nukleyar ug ginaagda ang ultrana-

syunalismo, pasismo ug rasismo. Apan mahimong pahimuslan sa hinay ug gagmay'ng nasud ang inter-imperyalistang kontradiksyon aron panalipdan ang ila-ilang soberanya ug interes. Taliwala sa pagduso sa US sa negosasyon, padayon nga nagapanghingusog ang North Korea sa katungod niining magpalambo og mga armas nukleyar bisan pa nga nagdeklara kini og kaandamong ihunong ang programang nukleyar kung ihunong sa US ang mga sangksyon niini. Nagapabiling balwarte ang Cuba sa pagsukol sa imperyalismong US. Sa tabang sa Russia ug China, napadugay sa Venezuela ang mga sangksyon sa US. Padayon nga nagkapatigayon ang Iran ug Germany, France, China, Russia ug uban pa taliwala sa sangksyon sa US.

Sa tibuok kalibutan, nagasukol ang katawhan sa lain-laing natad batok sa nagkagrabeng mga katilingbanon ug ekonomikanhong lakang ilalum sa neoliberal nga palisiya, ingonman batok sa imperyalistang pagpanakop ug agresyong militar. Sa Venezuela, milyun-milyon ang nagarali aron suportahan ang gubyernong Maduro batok sa pagpanakop sa US. Maisugon nga ginaatubang sa pilaan ka libong katawhan sa France ang nagkabangis nga pagpanumpo sa pulis ug nagalunsad og sinimanang demonstrasyon sukad Oktubre batok sa bag-ong mga buhis ug pagkibhang sa katilingbanong gasto ug aron ipanawagan ang pagpalagpot sa guberno. Nagakaylap sa Europe ang susamang mga protesta. Hilabihan ka paborable ang kahimtang aron maghatag ang mga pwersang komunista sa proletaryong makihut-ong pagpangulo sa lapad nga masang anakpawis.

Nagapadayon ang mga armadong pagsukol. Padayon ang katawhang Kurdish sa pagduso sa katungod sa kaugalingong paghukom pinaagi sa armadong pagsukol. Ang gubat sa katawhan sa India ug Pilipinas nagalahutay ug padayong nagangkon og kadaugan.

# Ginapagrabe ni Duterte ang pasistang pagpanumpo taliwala sa nagkagrabeng sosyo-ekonomikong kahimtang

PADAYON NGA NAG-ANTUS ang katawhang Pilipino sa nagkagrabeng mga sosyo-ekonomikong kahimtang nga nahimong dayag sa nagsutoy nga presyo sa palaliton, hilabihan ka ubos nga kita, kaylap nga kawalay panginabuhian, pagkaabog sa panginabuhian sa kabukiran ug kawalay batakang katilingbangong serbisyo. Gapangabuso ang rehimeng US-Duterte sa gyerang pagpanumpo niini ug iskema sa pagtukod og pasistang diktadurya.

Ginakumpirma sa pinakaulahing mga timailhan nga nagapabiling anaa sa grabeng krisis ang ekonomiya sa Pilipinas nga nagasandig sa importasyon ug nakatutok sa pag-eksport. Pinakataas na ang P41.44 bilyon nga depisito sa patigayon niadtong nilabay'ng tuig, mas taas og 51% kumpara sa nilabay'ng tuig, bunga sa pangkalibutang istagnasyon ug hinay nga demand alang sa semi-manupakturang eksport sa Pilipinas. Mikabat og P558.3 bilyon ang depisito sa guberno niadtong nilabay'ng tuig. Aron dugangan ang kakulang sa pondo, nangutang ang gubyernong Duterte niining Enero og \$1.5 bilyon gikan sa langyaw'ng tigpautang.

Nihagba og kapin 3% sa unang 11 ka bulan sa 2018 ang direktang langyaw'ng pagpamuhunan, kadunganan ang 41% nga paghagba sa bagong giapubahang negosyo sa mga economic zone niadtong 2018. Nahimo kining dayag sa pagkabangkarote sa Hanjin, kumpanyang nagahimo og mga barko, nga naga-empleyo og anaa sa 30,000 ka mamumuo.

Walay katugbang ang kawalay trabaho ilalum kang Duterte. Ginapakita sa mga taho niadtong Enero nga miubos og 387,000 ang ihap sa mga Pilipinong adunay trabaho kumpara sa nilabay'ng tuig. Aron tabunan ang kagrabe sa krisis sa trabaho, dili na lang ginaihap sa mga tighimo'g estadistika ni Duterte ang milyun-milyong walay trabaho nga nagaresulta sa pagpaubos sa tantos sa pagtampo og kusog-pamuo (labor force participation rate) ngadto sa 60.9%, pinakaubos sulod sa 30 ka tuig, ug tungod niini, maluibong gipaubos ang tantos sa disempleyo ngadto sa 5.2%.

Ginabana-bana nga ang tinuod

nga tantos sa disempleyo, kung ilakip kadtong mga gitangtang sa listahan sa kusog pamuo, mokabat sa 9.8% ug mahimo pa'ng motaas kung ihapon kadtong mga kulang ang trabaho, nga sa aktwal, walay trabaho. Ginapakita sa bagong pagtuon nga mihagba sa 81,000 ang abereyds nga ihap sa mga bagong trabaho nga tinuig nga ginamugna ilalum kang Duterte, wala pay dyes porsyento kumpara sa tinuig nga abereyds nga 825,000 niadtong nilabay'ng dekada. Pakyas pa gihapon ang saad ni Duterte nga magmugna og trabaho ang programang pang-imprastruktura.

Nag-unang resulta sa ulahing gipahamtang nga buhis, miusbaw og 5.2% ang tantos sa implasyon niadtong 2018, sukad 2.9% sa nilabay'ng tuig ug 1.3% niadtong 2016. Dili kunswelo ang mga taho nga niubos na ang tantos sa implasyon ngadto sa 4.4% ug 3.8% niadtong Enero ug Pebrero tungod kay padayon nga nagataas ang presyo sa pagkaon ug uban pang nag-unang palaliton samtang nagapabiling sobra ka ubos ang suhol. Mitaas sa dili moubos sa pito ka pilo ang mga presyo sa produktong lana sa nilabay'ng mga semana. Sa katapusang bahin sa 2018, ang matag adlaw nga gasto sa panginabuhian sa National Capital Region (NCR) mokabat og P1,196 alang sa unom-ka-tawo nga pamilya ug P966 alang sa lima-ka-tawo nga pamilya. Walay pulus ang gitaas nga inadlaw'ng suhol sa mga mamumuo sa NCR nga P25 ngadto sa P537 nga halos katunga lang sa matag adlaw nga gasto sa panginabuhian.

Gipatuman niadtong Marso 5 ang liberalisasyon sa pag-import og bugas, nga maluibon nga gihulag-

way sa rehimeng Duterte nga “tari-pikasyon”. Magresulta ang gidahom nga pagbaha sa gi-import nga bugas og grabeng kadaot sa milyun-milyong lokal nga mag-uuma sa humay, kadaghanan mga tenante ug mamumuong-panguma, nga mawad-an og kita atubangan sa mas ubos nga presyo sa lokal nga humay taliwala sa nagkadakung gasto sa produksyon ug taas nga abang sa yuta. Ginaduso sa mga opisyal ni Duterte nga isalikway na sa mga mag-uuma ang produksyon sa bugas, sa paglaom nga malibre ang lapad nga umahan alang sa pag-ilis-og-gamit.

Wala'g tuo ang naabog sa kabanikahan tungod sa mga proyektong pang-imprastruktura, pangturismo ug pang-enerhiya, ingonman sa paglapad sa operasyong mina ug plantasyon. Mikabat og 1.7 milyon sa agrikultura ang nawad-an og panginabuhian niadtong nilabay'ng tuig. Aron alam-alaman ang nagkagrabeng pagkadiskuntento sa kabanikahan, nagpakayab si Duterte nga pekeng reporma sa yuta ug gipanghinabog nga “distribusyon sa yuta” ang pagapud-apod og sertipiko alang sa pagpanag-iya sa yuta nga nagamando sa mga mag-uuma nga magbayad og regular nga amortisasyon.

Misutoy ang kaso sa pagpanglapas sa katungod-tawo sa pagpangabuso sa mga pwersang militar ug pulis ni Duterte sa gipagrabeng gyerang pagpanumpo ug pasistang teror. Dayag ang pagdaghan sa mga atake sa militar ug pulis batok sa mga sibilyan ug ligal nga mga organisasyon sa Negros, Samar ug Bicol, nga gipailalum sa state of emergency ug de facto nga balaod militar sukad Nobyembre sa nilabay'ng tuig. Wala usab nilurang ang mga abusong militar sa Mindanao ug sa ubang bahin sa nasud.

Kaylap ang pagpatay sa mga lider masa ug aktibistang mag-uuma. Padayon ang militar sa arbitraryong pag-akusa ug pagtudlo sa mga sibilyang residente ug mga tibuok ko-

munidad isip mga myembro o tigsuporta sa BHB ug pag-laras kanila nga mga “surenderi.” Walay kaluoy ang pag-lapas sa katungod sa mga bata kauban ang mga taho sa arbitraryong pagbalhog sa mga menor de edad. Padayon nga nagaresulta og dinaghang kahadlok sa lokal nga populasyon ang mga operasyong militar nga suportado sa pagpamomba ug pagpanganyon. Mga tibuok komunidad sa Surigao del Sur, Samar, Bukidnon, Negros Oriental ug uban pa ang pugos nga nakabakwit tungod sa pag-okupa sa mga pasistang sundalo sa ilang mga barangay.

Nahimong pinakabangis ang mga operasyong militar ug pulis sa Negros ilalum sa gibantog nga “synchronized enhanced managing of police operations” (SEMPO o Oplan Sauron) kung asa nagapahigayon sila og dungandungan nga reyd sa kadlawon ug ayha ang kadlawon, ug mga paghulhog sa pilaan ka baryo sa pipila ka lungsod. Susama sa kampanya sa dinaghang pagpatay nga “Oplan Tokhang,” ginapahigayon kini sa tabil sa paghatod og mga mandamyento de aresto sa kasagarang mga krimen ug rebelyon apan mopadulong sa planadong pagpatay sa mga lider mag-uuma, dinaghang arbitraryong pagpatay ug pag-aresto. Ginadumog ug nagasabwag og teror sa tibuok komunidad ang panon sa mga armadong sundalo.

Anaa karon sa pungkay si Duterte sa usa ka, sa pag-katinuod, huntang sibil-militar sa dagway sa National Task Force “aron tapuson ang lokal nga komunistang armadong panagbangi.” Gamit ang “whole-of-nation approach” (gikan sa kanhing palisiyang “whole-of-government” ilalum sa National Internal Security Plan, ginahimo ang lain-laing ahensya sa gubyrno ug mga lokal nga upisyal sa gubyrno isip ikog sa AFP sa kontra-insurhensya.

Ginagamit sa militar ug pulis ang tabil nga pagred-tag ug pag-ila nga terorista aron targeton ang mga pangpulpitika ug katilingbanong aktibista. Gitarget sa rehimen ang mga progresibong grupong party-list ug mga organisasyon sa mga mamumuo, mag-uuma, kabus sa kasyudaran, nasudnong minorya, magtutudlo, midya, abogado, relihiyoso, kabatan-onan ug uban pang sektor. Ginapaniktikan, ginapig-ot, ginadautan ug ginapatay ang pipila ka mga myembro. Nagapakaylap ang mga ahente og mga polyeto ug poster nga nagalista sa ila isip mga

“komunista.” Sulod sa pila ka semana sa pag-abli niini nga tuig, mapadayunon ang mga cyber attack sa mga alternatibong midya sa pagsulay nga pahilumon sila pinaagi sa pagbabag sa ilang mga website. Susama nga mga atake ang gipahigayon batok sa website sa Partido.

Naglungang sa lalom nga panagbanging paksyunal ang mga nagharing hut-ong oligarko ug burukrata-kapitalista. Nagpungasi ang pag-indigay sa mga pangpulpitika ug pang-ekonomiyang pundok alang sa mga prangkisa, ug kikkak ug porsyento sa mga gipatangang mga proyektong pang-imprastruktura ug kontratang gubyeno. Ginapakita sa kagulyang sa gidak-on sa pork barrel nga milungtad sa dili pagpirma sa badyet sa 2019 ang grabeng bangiyay tali kang Duterte ug ubang paksyon, lakip ang kang Arroyo nga kaalyado niya sa eleksyon ug pulpitika.

Nagalambigit ang maong indigay sa nagaharing hut-ong sa diskuntento sa katawhan sa nagkagrabeng sosyo-ekonomikong kahimtang ug nagatukmod sa lalom nga krisis sa nagaharing sistemang pangpulpitika. Ginapagrabe pa kini sa pagtinguha ni Duterte nga monopol-yohon ang poder ug palanaton ang burukrata-kapitalistang paghari sa iyang pamilya nga nagapagrabe sa mga antagonismo.

Nagapakita ang tanang timailhan nga gusto ni Duterte nga mahimong usa ka pasistang diktador pinaagi sa pagduso sa kongreso sa pagbag-o sa konstitusyon aron tukuron ang usa ka “pederal” nga sistema sa gubyrno kung asa isentralisa sa iya ang gahum ug siya ang magtudlo sa mga kaalyadong warlord ug dinastiya isip mga pangrehiyon ug lokal nga lider; o pinaagi sa direktang deklarasyon sa balaod militar ug pag-angkon og mga awtokratikong gahum.

Ginagamit niya ang de facto nga balaod militar sa tibuok nasud, ingonman ang pekeng gyera sa droga, aron manipulahon ang umalabot nga eleksyon sa Mayo, o hingpit kining ibasura. Ginaluto na ni Duterte ang eleksyon. Ginagamit niya ang hulgang ilakip sa iyang tinumutumong “narcolist” batok sa mga karibal, ug ang Red-tagging, pagbahad ug pagpanghadlok batok sa mga progresibo, makinasudnon ug demokratikong organisasyong party-list aron babagang makakuha sila og dugang nga pwesto sa kongreso.

---

## **Nagaasdang ang armadong pakigbisog sa tibuok nasud samtang ginasuklan sa katawhan ang pasistang rehimen ni Duterte**

PADAYON NGA NAGAASDANG sa tibuok nasud ang rebolusyonaryong armadong pakigbisog nga ginapaasdang sa Bagong Hukbong Bayan. Niadtong 2018, ginapatigbabawan sa BHB ang todong opensiba ug mga nakapokus nga operasyong militar sa kaaway. Naatubang sa pasiunang mga kalisdanan ang mga yunit sa BHB sa mga taktikang kubkob sa kaaway hangtud sa unang kwarto sa 2018, ilabina sa Mindanao, apad nahuptan gilayon nila ang opensibang postura pag-abot sa ikaduhang kwarto.

Sa nilabayng tuig, nakalunsad ang BHB og pila ka gatus nga taktikal nga opensiba sa tibuok nasud. Kaylap nga aksyong isnayp ang gilunsad aron ata-

kehon ug silutan ang mga abusadong yunit ug personel sa kaaway. Dugang pa, nakalunsad ang mga yunit sa BHB og mga mahinungdanong anihilatibong aksyon kung asa napuo ang mga tibuok yunit sa kaaway ug nakumpiska ang ilang mga armas sa mga Pulang manggugubat. Nakumpiska sa BHB ang dili moubos

sa 107 ka kusgan nga mga pusil gikan sa kaaway'ng armadong kusog ug pulis, pribadong goons ug mga security agency nga nag-alagad sa mga dagkung operasyon sa mina. Ang pinakadakung bitad sa mga kusgan nga pusil nasakmit sa Kalina (30), Agusan del Sur (28) ug Northern Samar (10).

Sukad 2015, gideklara sa AFP ang kalit nga tumong nga puuhon ang BHB sa Eastern Mindanao. Sa sugod sa 2018, hangtud 75% sa mga tropang pangkombat sa AFP ang gipakat niini sa isla aron puuhon ang BHB ug armadong pagsukol sa Moro ug maglunsad ug magkasunod nga nakapokus nga operasyong militar nga nagapalihok sa mga batalyong suportado sa mga kanyon ug helikopter. Naghatag kini ug higayon sa mga rebolusyonaryong pwersa sa Luzon ug Visayas aron magpalapad ug paspas nga ias-dang ang ilang gimbuhaton. Atubangan sa lig-on nga pag-asdang sa BHB sa mga rehiyon sa Luzon ug Visayas, napwersa ang AFP nga iubos sa 65% ang tropang nakapakat sa Mindanao sa katapusan sa 2018, ug hangtud 60% sa kasamtangan.

Atubangan sa todong opensiba sa kaaway, maisugon nga nakadepensa ang mga yunit sa BHB sa Mindanao. Adunay mga yunit ug natarang gerilya sa BHB nga nakaangkon og kapildihan resulta sa pagkabutyag sa mga operasyong paniktik sa kaaway sa panahon sa lima ka bu-lang magkadungan nga mga unilater-al nga hunong-buto sukad Agosto 2016 hangtud Enero 2017, kapakyas nga paspas nga makapahiuyon atubangan sa gipagrabeng mga opensiba human gitapos ang hunong-buto, ingonman sa mga pangsulod nga problema sa pagpa-uk-ok ug sobrang pagkakatang sa gagmay nga yunit nga nagbutang sa ila sa peligro sa pagkubkob sa kaaway. Ingonman, sa kinatibuk-an, napatigbawan sa BHB ang pagkubkob sa kaaway ug mga kampanya sa gradual constriction pinaagi sa pagpahimulos sa lapad nga gintang tali sa mga yunit sa kaaway ug paglunsad ug mga taktikal nga opensiba aron magkontra-kubkob sa mga nabulag

nga yunit sa kaaway, ingonman aron birahan kini gikan sa ilang likuran ug kiliran. Pinaagi sa lalom ug lapad nga suporta sa masa ug pagkahanas sa gerilyang pakiggubat, kadaghanan sa mga yunit sa BHB sa Mindanao padayon nga lig-ong nga-gasdang ug nakapalapad.

Nakaangkon ang kaaway og dili moubos sa 600 ka kaswalidad niadtong 2018, kung asa kapin 380 killed-in-action, kapin 40% nga mas taas kumpara sa milabay'ng tuig. Ang mga yunit sa AFP nga nakaangkon og pinakadaghang kaswalti mao kadtong nakadeploy sa nakapokus nga mga operasyong militar sa mga probinsya sa north central ug northeastern Mindanao kung asa nakalunsad ang mga yunit sa NPA og mga aktibong depensa ug napakyas ang mga opensiba sa kaaway. Makaangkon ang AFP og subli-subling kapildihan kung asa dili moubos 185 ka tropa sa kaaway ang killed-in-action sa tibuok eastern Mindanao.

Ang Marine Battalion Landing Team 2 ang nakaangkon og pinakadakung kapildihan sa usa ka banatan sa dihang 21 sa mga nisugok nga tropa niini ang namatay sa ambus sa BHB sa Sultan Kudarat niadtong Setyembre. Sa susamang prubinsya, dili moubos sa 35 sundalo sa 3rd Marine Company Reconnaissance Group ang namatay sa dihang naigo sa kaugalingong mga bomba sa AFP ang ilang pusingon human mapildi sa ambus sa BHB niadtong Oktubre.

Atubangan sa mapadayunon nga pagkusog sa BHB sa tibuok nasud, nakibhangan ang kanhing pagpasigarbo sa mga opisyal pangseguridad nga pildihon ang BHB sa tunga-tunga sa 2019. Inay, giuswag nila ang ilang "dedlayn" sa katapusan sa 2022.

Samtang nagalunsad og armadong pakigbisog, padayon ang BHB ug ang masang mag-uuma sa pagtukod ug pagpakusog sa mga organisasyong masa sa mga mag-uuma, kabatan-onan, kababayen-an, mga bata ug aktibistang pangkultura. Ginatukod sa maong mga organisasyon ang mga komite sa depensa-sa-kaugalingon aron ipabilin ang kalinaw ug kaangayan ug pagdepensa sa komu-

nidad. Ginatukod ug ginabansay ang mga yunit sa milisyang bayan. Kining tanan ang sukaranan sa pagtukod og mga komiteng rebolusyonaryo sa barangay ug mas taas pa nga angang, ug nagabarog nga mga organo sa pulitikanhong gahum ug mga batakang yunit sa demokratikong guberno sa katawhan.

Suportado sa BHB, padayon nga naglunsad ang mga organisasyong mag-uuma sa mga pakigbisog sa reporma sa yuta subay sa Rebolusyonaryong Giya sa Reporma sa Yuta sa Partido. Ilalom sa minimum nga programa, liboan ka kabus nga mag-uuma ug mamumuong panguma sa mga natarang gerilya ang nibarog niining nilabay'ng tuig aron iduso ang pagpaubos sa abang sa yuta, taas nga suhol ug makatarunganong presyo sa ilang mga produkto. Nagpahigayon usab sila og mga batakang porma sa kooperasyon ug naglunsad og mga kampanya sa produksyon aron itaas ang kita. Gipahigayon ang maksimum nga programa sa pagkumpiska ug distribusyon sa yuta sa mga baseng purok kung asa mapanalipdan sa BHB ug sa guberno sa katawhan ang mga kadaugan.

Ilalom sa mga organo sa gahum pangpulitika, ginapahigayon ang mga programa alang sa literasiya ug numerasiya alang sa mga bata ug tigulang, klinikang pangmasa ug kampanyang panglawas ug uban pang kampanyang masa aron iduso ang kaayuhan sa katawhan. Tungod nakapreserba og kusog ug nakalabang batok sa usa sa pinakadakung nasudhong opensibang kampanya sa AFP niining nilabay'ng mga tuig, anaa sa kahimtang karon ang BHB nga iasdang ang gubat sa katawhan sa mas taas pa nga angang sa moabot nga mga tuig.

Atubangan sa nagkagrabeng sosyo-ekonomikong kahimtang ug pasistang pagpangatake sa rehimeng US-Duterte, hilabihan ka tinaw sa katawhang Pilipino nga makatarungan ug kinahanglang iasdang ang rebolusyonaryong armadong pakigbisog.

Kadungan niini, lig-on nga ginalunsad sa mga mamumuo ug mag-uuma ug sa malangkubon nga mga

demokratikong sektor ang mga ligal nga pakigbisog aron panalipdan ug iduso ang ilang mga demokratikong katungod. Dili matandog ang determinasyon sa mga ligal nga pwersang progresibo ug nasudnon-demokratiko nga makigbisog atubangan sa balaod militar sa Mindanao ug de facto nga balaod militar sa tibuok nasud kung asa ginaatubang nila ang mga hulga sa pag-aresto, pagpriso, tortyur ug pagpatay sa mga pwersa sa estado.

Padayon nga nagkalapad ang nagkahiusang prente batok sa tiraniya ni Duterte, ug ginahiusa ang lapad nga han-ay sa mga pwersa. Ginabutyag ug ginasuklan nila ang plano ni Duterte aron bag-uhon ang konstitusyon isip kabahin sa iyang iskemang tukuron ang dayag nga pasistang diktadurya. Nagabantay sila batok sa plano ni Duterte nga manipulahon ang eleksyon gamit ang pwersa o paglimbong sa elektronikong sistema sa pag-ihap ug paglista sa boto.

Nagapangayo sila og hustisya alang sa tanang biktima sa kaylap nga abuso sa katungod-tawo. Naga-

pangita sila og aksyong ligal bisan sa mga reaksyunaryong korte, sa kongreso ug uban pang porum. Mas mahinungdanon pa, padayon silang nga gaasembliya ug nagademonstrasyon aron gamiton ang kolektibong katungod sa katawhan ug ipakita ang pagsupak sa pagharing teror ni Duterte ug isinggit ang pagpalagpot sa pasistang naghari-hari.

Ginapahayag usab nila ang ilang mga yangongo batok sa nagtaas nga presyo, pabug-at nga mga buhis, ubos nga suhol, dunot nga pangpublikong imprastruktura, kawalay batakang katilingbanong serbisyo, gipatangang mga proyekto sa guberno, malukpanong pag-ilis-sa-gamit ug pagkawkaw sa yuta, mga proyektong imprastrukturang nagan-gun-ob sa kinaiyahan, pork barrel, pagtugyan sa rekurso ug patrimonya sa nasud, presensyang militar, pagpanghilabot ug suporta sa US sa pasistang rehimen, ug uban pang giabaga nilang problema.

Samtang nagalunsad ang katawhang Pilipino og mga anti-imperyalista, antipyudal ug antipasistang pakigbisog ilalum sa rehi-

meng Duterte, nagkadaghan ang nagasalmot sa tago nga rebolusyonaryong kalihukan. Padayon nga nagkalapad ang mga alyadong organisasyon sa National Democratic Front sa kabukiran, sa mga syudad ug sentrong lungsod, ingonman sa laing nasud. Sila ang lapad nga suportang base alang sa rebolusyonaryong armadong pakigbigbisog.

Padayon nga nagkakusog ang Partido sa ideolohiya, pulitika ug organisasyon. Lig-on niining gipanguluhan ang hukbong bayan ug ginahiusa ang katawhang Pilipino aron batukan ug palagputon ang pasisteng rehimen US-Duterte.

Taliwala sa nagkagrabeng kahimtang sa sistemang semikolonyal ug semipyudal, kinahanglang pukawon sa ilang walay susama nga ihap ang lapad nga masa aron maglunsad og rebolusyonaryong armadong pakigbisog. Ginaduso sa dunot, pasista ug papet nga rehimen ni Duterte ang katawhang Pilipino aron mosampa sa BHB sa paglunsad niini og gubat sa katawhan sa mas taas pa nga ang-ang.

## Mapangahason nga padilaabon ang gerilyang pakiggubat! Hingpit nga batokan ang rehimen US-Duterte ug iaslang ang gubat sa katawhan!

GITUKOD ANG BHB sa ikaduhang distrito sa Tarlac singkuenta na katuig ang nilabay nga adunay 60 ka Pulang manggugubat, siyam ka ripleng awtomatik ug 26 ka mas hinay nga armas. Aduna kini'y 80,000 ka baseng masa. Sa kasamtangan, may pila ka libong Pulang manggugubat ang BHB nga naarmasan sa tag-as nga mga kalibrenng pusil. Aduna usab kini'y mas daku nga ihap sa pwersa sa mga yunit sa milisyang bayan ug mga kwerpo sa pagpanalipod-sa-kaugalingon nga nagagamit sa mga armas nga hinay ug tradisyunal ug mga eksplosibo.

Ang mga kadaugan sa Bagong Hukbong Bayan sa nangaging singkuenta katuig ang timaan sa kahusto sa pangkinatibuk-ang linya sa bag-ong demokratikong rebolusyon sa katawhan pinaagi sa malungtarong gubat sa katawhan ug pagpangulo sa Partido Komunista. Padayon nga ginapalambo ug ginapabandi sa Partido ang estratehiya ug mga taktika sa gubat sa katawhan

sa Pilipinas pinaagi sa pagkutlo sa mga pagtulun-an gikan sa kaugalingon niining kasinatian, ingonman gikan sa mga kasinatian sa ubang nasud ug sa mamugnaong pagdapat sa batakang mga prinsipyo sa Marxismo-Leninismo-Maoismo sa kongkretong kahimtang ug praktika sa rebolusyong Pilipino.

Sa dagan sa lima ka dekada nga gubat sa katawhan, nakatukod kita



og usa ka hukbong bayan nga langkob ang tibuok nasud nga matngon sa pulitika, disiplinado ug determinadong maglunsad og gubat sa katawhan. Nagalunsad kini og kaylap ug nagdilaab nga gerilyang pakiggubat subay sa nagkalapad ug nagkalalum nga baseng masa. Nakatukod kini og mga organo sa pulitikanhong gahum nga nagsilbing pundasyon sa

pagtukod sa demokratikong gubyer-  
no sa katawhan nga nagalangkob sa  
interes sa mga mamumuo, mag-uu-  
ma ug uban pang progresibong sek-  
tor ug makinasundon nga mga hut-  
ong. Malangkubon nga ginapatuman  
ang reporma sa yuta aron tubagon  
ang batakang demokratikong pa-  
ngandoy sa katawhang Pilipino. Na-  
patigbabawan sa maong kadaugan  
ug sa daghan pang uban nga mga  
nakab-ot sa nangaging tunga'ng sig-  
lo sa pagsukol sa kolonyalismo ug  
neokolonyalismo.

Gipakyas sa BHB ang tanang ti-  
po sa mga kampanyang pagpuo ug  
gradwal nga konstruksyon nga gidi-  
rihe ug gisuportahan sa US ug gi-  
lunsad sa AFP sa nangaging sing-  
kwenta katuig. Sama sa tanan nga  
nangaging plano, mapakyas ang  
Oplan Kapayapaan ni Duterte ug  
National Internal Security Plan niini  
sa gideklarang tumong nga dugmu-  
kon ang BHB pagtungong sa 2022.

Ginapaasdang sa katawhang Pi-  
lipino ang ilang anti-imperyalista,  
antipyudal ug antipasistang mga  
pakigbisog, ginapalapad ang ilang  
nagkahiusang prente ug nagabatok  
sa pasistang rehimeng US-Duterte.

Ilalum sa pagpangulo sa Partido,  
determinado ang BHB nga iasdrag  
ang gubat sa katawhan ngadto sa  
abanteng subyugto sa estratehikong  
dependensya ug ihatud kini duol sa pul-  
tahan sa estratehikong pagkapatas.  
Kinahanglang kumpletuhon sa BHB  
ang mga responsibilidad sa kasamta-  
ngang tungang yugto ilabina kadtong  
mga batakang katungdanan sa pag-  
palambo sa pormasyong platon isip  
batakang pormasyon, pagtukod ug  
gidak-ong-kumpanyang mga nata-  
rang gerilya ug pundok sa mga nata-  
rang gerilya, pag-armas sa nagada-  
kong ihap sa katawhan aron ilunsad  
ang kaylap nga gerilyang  
pakiggubat sa masa,  
ug pagpaasdang



sa lapad ug lalum nga gerilyang pa-  
kiggubat sa basehan sa nagkalapad  
ug nagkalalum nga baseng masa. Su-  
bay sa 5-katuig nga programa sa Ko-  
mite Sentral, mando sa Partido sa  
BHB ang mapangahason nga padi-  
laabon ang gerilyang pakiggubat sa  
tibuok nasud ug iasdrag ang bug-os  
nga pagsukol sa pasistang rehimeng  
US-Duterte.

Kinahanglan padayon nga mag-  
pakusog, magpalapad ug moasdrag  
sa tibuok nasud ang BHB, ug kab-u-  
ton ang mas epektibong pagtinaba-  
ngay ug koordinasyon sa pagpaas-  
drag sa gerilyang pakiggubat sa ti-  
buok nasud. Kinahanglan magpa-  
lambo og 7-10 ka abante nga mga  
rehiyon nga may kapin kun kulang  
2,000 ka Pulang manggugubat ma-  
tag usa, nga nakakatag sa Luzon,  
Visayas ug Mindanao.

Kinahanglan magpalambo ang  
Partido ug BHB sa abanteng mga  
rehiyon nga may 3-5 ka lumpong  
nga mga kusog-kumpanyang nata-  
rang gerilya. Magsilbi kini isip mga  
taliba ug sandigan alang sa inter-  
rehiyunal ug nasudnong pag-as-  
drag. Kung adunay mga lumpong  
nga may usa hangtud duha ka regu-  
lar o -gamay nga kumpanyang na-  
gasilbing sentro de grabidad, ug  
mga pwersang horisontal nga 9-15  
platon sa 3-5 nga nagtalikuran nga  
natarang gerilya ug kung may gatu-  
san ka yunit sa milisyang bayan nga  
nakakatag sa mga baryo ug lungsod,  
mas epektibong mabatokan ang di-  
nugay ug dinagkong mga kampan-  
yang militar ug atake ug nagahatag  
og igo nga lapad ug lalum aron sa  
padayon ug tanang-bahin nga pag-  
lambo sa gerilyang pakiggubat, ag-  
raryong rebolusyon ug baseng ma-  
sa.

Kinahanglang pila ka higayon  
natong pakusgon ang BHB ug iangat  
ang katakus niini sa pagpuo sa mga  
tim ug iskwad sa kaaway, ug sa ka-  
dugayan tibuok mga platon. Sa ma-  
tag rehiyon ug subrehiyon, kina-  
hanglang kita nga adunay usa ka  
kumpanyang bertikal nga may tulo  
ka platon sa matag siyam ka platon  
nga horisontal (1:3). Padayon nato

nga ginasunod ang pagkatag sa ho-  
risontal ug bertikal nga mga yunit  
gerilya sa timbang nga 70-30. Sa  
kasinatian sa lain laing rehiyon, ang  
pinakaproduktibong mga kahimtang  
mao kadtong maayo nga nakatag  
ang mga platon alang sa padayon  
nga gimbuhatong masa ug malang-  
kubon nga gerilyang pakiggubat sa  
stratehikong mga lugar. Ginatudlo  
sa atong mga kasinatian nga ang  
mga problema, kahuyangan ug li-  
mitasyon nga lutaw ug may ten-  
densyang modaghan kung nipis na-  
tong ginakatag ang atong mga  
pwersa sa mga gamay nga horison-  
tal nga yunit ug nakalimtan nga  
magtukod og parehong mga bertikal  
nga yunit, ug ang bali niini, kung  
ang mga pwersang bertikal dili pu-  
panahong matukod, ug walay katu-  
gabang nga latag sa mga horisontal  
nga yunit.

Ang nagalangkob sa mga pwer-  
sang horisontal ang kaylap ug lalum  
samtang ginalangkuban sa mga  
pwersang bertikal ang konsentra-  
syon ug uban pang elemento sa re-  
gular nga gerilyang malihukon sa  
tumong nga yugto-yugtong palam-  
buon ang anihilatibong kapasidad sa  
hukbong bayan. Kung itandi sa mga  
pwersang horisontal, mas kon-  
sentrado ang mga pwersang bertikal  
ug nagalihok sa mas lapad nga  
mga lugar nga mas paspas, nga  
nag-inusara o kauban ang mga  
pwersang horisontal kung gikina-  
hanglang, aron birahan ang mga na-  
kabulag ug bulnerableng mga yunit  
sa kaaway. Taliwala sa mga gyera,  
kinahanglang usab silang motabang  
sa paglunsad og mga kampanya ug  
pakigbisog sa masa, mosalmot sa  
produksyon, magpahigayon og mga  
pagbansay, edukasyon ug pangpu-  
litikang gimbuhaton. Aron mahi-  
mong tinuod nga mga sentro de  
grabidad sa mga pwersang hori-  
sontal ug makahatag og prayoridad  
sa pagpasubsub sa mga taktikal nga  
opensiba, kinahanglang dili mahikot  
ang mga bertikal nga yunit sa usa  
ka partikular nga nataran o sona o  
di kaha nalatid isip pwersa sa mga  
hedkwarters o pwersang pangse-



guridad sa mga dagkung miting.

Aron maayo nga makapapel ang mga pwersang gerilya sa ilang nag-unang tahas sa pagsukol sa kaaway, dili sila kinahanglan malimitahan sa administradong mga responsibilidad sa partikular sa mga lokalidad. Kinahanglang tukuron ang bulag nga mga komite sa Partido nga mogunit sa responsibilidad sa komprehensibong pagpangulo sa teritoryo ug pagdumala sa mga seksyon, nataran ug subrehiyon. Ingonman, dili buot ipasabot nga lingkawas na sa gimbuhatong masa ug gimbuhatong produksyon ang mga yunit gerilya. Sa pagkatinuod, sila ang nag-unang pultaym nga pwersa sa nangulong mga komite sa Partido sa mga teritoryo sa pagpalapad ug pagkonsolidada sa baseng masa, paghimo og mga propaganda, pampulitikang edukasyon, pag-organisa, pagpalihok sa han-ay sa masa, pagpaasdang sa antipyudal nga pakigbisog ug uban pang kampanya ug pakigbisog sa masa, pagpatuman sa mga balaod ug palisiya sa gubyerno sa katawhan, ug pagpatuman sa kampanya sa produksyon. Ang mga komite sa Partido sa ang-ang seksyon hugot nga makigtinabangay sa mga platurang gerilya, kung asa nakabase ang ilang bag-as.


Kinahanglan natong mahukmanong sulbaron ang dugay na nga problema sa sobrang pagkatag sa mga pwersa ug pagkatag sa atong mga pwersa nga sobra na kaayo ka layo ug bulag-bulag nga mga iskwad ug tim nga grabeng limitado ang kakayahan alang sa gimbuhatong pangmilitar ug pangpulitika. Kini ang kasagarang resulta sa makiusanan-ka-bahin sa pag-apas sa pinakalapad nga maniobrahan bisan nipsis ug mabaw ug paggunit sa grabe ka daghang estratehikong lugar nga dili epektibong nalihukan. Walay-kinutuban nga pagkalimot ug pagpadaplin sa batakang katungdanan sa pagtukod og mga platurang, kusog-kumpanyang natarang gerilya ug mga lumpong sa nagtalikuran nga natarang gerilya. Ang kasagarang resulta mao ang konserbatismo sa

militar ug pulitika ug pagkapasibo ug mga kadaut sa hukbong bayan ug baseng masa kung giatake sa kaaway.

Kinahanglan kanunay natong ginabalanse ang pagpalapad ug konsolidasyon ug magkat-on nga moasdang nga pabalud-balod. Base sa kinatibuk-ang kusog sa kadre, ginsakpan ug armas, ang mga rehiyong nakigbugno sa problema sa sobrang pagkatag, kinahanglan nga maglatid og ihap sa natarang gerilya ug lumpong sa mga natarang gerilya nga makaya nila nga madumalahan og maayo ug mapalambo sa tukmang panahon, nga adunay tin-aw nga pagprayoridad sa lain laing erya aron sa hustong pagkatag sa limitadong ginsakpan ug rekurso. Bisan ang mga relatibong mga lambo na nga rehiyon kinahanglan maglatid og mga tin-aw nga prayoridad ug hugot nga koordinadong pagplano sa mga subrehiyon ug nataran, ug tali sa pagpalambo pa sa kanhi na nga mga nataran ug lumpong ug pag-abli og mga bag-o.

Magtukod og dinaghan nga mga yunit sa milisyang bayan ug mga yunit sa pagpanalipod-sa-kaugalingon sa mga organisasyong masa, bansayon ug armas sila ug iangat ang ilang katakus sa paglunsad og gerilyang pakiggubat sa masa. Ginapabilin nila ang kalinaw ug han-ay ug ginaampingan ang seguridad sa mga rebolusyonaryong organisasyon ug aktibidad sa ilang lugar. Nagapapel sila sa pinakamahinungdanong papel sa mga taktikal nga opensiba, pagpatrolya ug mga aksyong haras batok sa naga-operasyong tropa sa kaaway, gimbuhatong paniktik, ug pagsilot sa mga espiya sa kaaway ug kontra-rebolusyonaryong kriminal. Nagaalagad usab sila isip reserbang pwersa sa hukbong bayan.

Kinahanglan kitang maghatag og dugang paningkamot nga subling buhion ang mga operasyong partisano ug subling tukuron ang mga yunit partisano sa mga sentro sa urban, sa mga nag-unang linya og transportasyon ug komunikasyon ug



uban pang bahin sa likuran sa kaaway isip gikinahanglang suporta sa pagsukol sa nagdagan nga pasistang pagpanumpo ug terorismo ug dinagkong mga opensibang militar sa rehimen. Kinahanglang gukuron ang mga mangtas nga pasista ug papanubagon sa ilang mga krimen bisan sa ilang mga taguanan sa lungsod. Kinahanglang pwersahon ang pasistang kaaway nga kanunay magbantay ug molingi-lingi sa iyang kiliran ug likuran. Sa maong hisgutanan, kinahanglan usab natong bantayan ang nangaging negatibong mga pagtulunan sa insureksyunismo, gangsterismo ug pag-una sa ligal nga pakigbisog sa masa sa mga sentrong urban.

Kinahanglang ilunsad ang mga kampanyang rekrutment aron dasigon ang masa nga mosampa sa mga yunit gerilya sa BHB, ingonman aron makatigum og suportang materyal ug uban pa. Pakusgon nato ang pagrekrut og mga kadre gikan sa mga mamumuo ug intelektwal.

Kinahanglan pakusgon ang BHB pinaagi sa pagtibuok sa ideolohiya, pagpakusog sa absolutong pagpangulo sa Partido ug mga organisasyon sa Partido sulod niini; sistematikong pagbansay aron iangat ang katakus sa kombat sa mga yunit sa BHB; pagpalambo sa mga armas; pagpataas sa kahimatngon sa pangpulitika, diwang opensiba ug kaamguhan sa pagsukol sa mga Pulong manggugubat; ug pagpakusog sa ilang puthaw nga disiplina ug ang dugtong sa masa.

Kinahanglang padayon natong pakusgon ang mga kumand sa BHB sa ang-ang sa mga nataran, subre-

hiyon ug mga rehiyon. Kini sila ang responsable sa hugot nga pagsu-baybay sa kahimtang sa pulitika ug militar sa ila-ilang mga erya ug ang-ang, nagahimo og husto ug pupana-hong mga pagpahapsay sa gimbu-haton, pamaagi ug maniobra subay sa mga pagbag-o sa operasyon ug lihoc sa kaaway, ug pagpakusog sa pagplano, koordinasyon, kooperasyon ug komunikasyon sa mga yunit sa BHB. Pinakamahinungdanon mahimong pleksible sila sa taktika ug dali nga pagpahaom sa paspas nga nagabag-ong kahimtang sa mga natarang gerilya ug lumpo.

Kinahanglan usab nga tukuron ang mg kumand sa operasyon sa ang-ang inter-rehiyon ug nasudnon aron iasdrag ang internasyunal nga koordinasyon ug kooperasyon, magbansay ug magpalambo og dakung ihap sa mga kadreng militar alang sa lain laing ang-ang ug erya sa responsibilidad, ug pakusgon ang katakus sa BHB sa mga prayoridad nga linya sa gimbuhaton sa militar ug pulitika. Kinahanglan natong pakyason ang todo gyera, gradwal konstrikasyon, win-hold-win, kampanyang triad ug nakapokus nga mga operasyong militar sa kaaway.

Sa kinatibuk-an, adunay tukma nga pwersang gerilya ug baseng masa sa matag rehiyon aron dugang pakusgon ang mga taktikal nga opensiba ug dinagkong pagpalapad ug konsolidasyon sa baseng masa. Ang mga kahuyangan sa indibidwal nga mga rehiyon matabunan sa mas hugot nga koordinasyon ug kooperasyon sa mga inter-rehiyunal ug nasudnong ang-ang, mas pleksibleng mga taktika ug mas maayo nga pagpalihok sa masa.

Pinakamahinungdanon ug kinahanglanon ang pagpasubsub sa gerilyang pakiggubat aron iasdrag ang uban pang gimbuhatong pangpulitika ug pangmilitar pareho sa lokal ug pangkinatibuk-ang konteksto. Kinahanglan kanunay hata-ga'g pagtagad sa mga nangulong komite sa Partido ang gimbuhatong militar. Kinahanglan natong isalikway ang sobrang pagtuo sa kaugali-

ngon, pagkapisibo, sobra nga pagkatag sa mga pwersa ug uban pang mga problema nga nagawala sa inisyatiba sa BHB.

Kinahanglan natong hingpit nga gamiton ang armadong kusog sa BHB, ang lalum ug lapad nga suport sa katawhan ug ang atong pagpakamaayo sa tereyn aron birahan ang kaaway sa mas daku ug mas paspas. Maglunsad kita og maayo nga naplanong mga taktikal nga opensiba nga siguro ang kadaugan ug may tumong nga puohon ang mga yunit sa kaaway ug sakmiton ang ilang mga armas. Ikonsentra ang mas dakung pwersa aron maglunsad og surpresang mga atake batok sa mas huyang, mas gamay ug nakakatag nga mga yunit sa kaaway. Magtigum og mga kadaugan gikan sa daghang mga sumbag sa lawas inubanan sa pupanahong pagbira sa ulo. Kinahanglan targeton sa BHB ang pinakamangtas nga pasistang kriminal, silutan sila sa ilang mga abuso ug bungkagon ang panghunahuna nila nga dili sila mapapanubag o masilutan.

Kinahanglan maayo ug alisto kita sa pagtibuok sa atong mga kasinatian sa mga sangka ug pagpakaylap sa mga pagtulun-an gikan niini. Kinahanglan kitang mokat-on gikan sa nagmalampuson nga anhilatibong taktikal nga opensiba sa lain laing erya, gikan sa mga kasinatian sa hingpit nga pagpahimulos sa kaka-poy ug kalisud sa kaaway aron birahan siya sa labing daku, gikan sa paspas nga pagkatag sa mga pwersa aron sakmiton ang mga oportunidad ug magkontrabira sa mga nagatakeng tropa sa kaaway, gikan sa maayo nga plano ug maayo nga pagpatuman sa mga operasyong partisano batok sa mga yunit sa paniktik sa kaaway, ug gikan sa malangkubon ug epektibong paggamit sa atritibong mga operasyon.

Kinahanglan natong ipakaylap ang mga pagtulun-an gikan sa mga kasinatian sa paglunsad og mga gerilyang kontra-kampanya nga nagakumbina sa magkasunod nga anhilatibong opensiba ug kaylap nga atri-



tibong mga aksyon, sa maayo nga paniktik sa erya ug lihoc sa kaaway, pinakamaayo nga plano sa erya ug gyera, lakip ang mga plano human sa gyera aron kontrahon ang reaksyon sa kaaway ug paspas ug walamdamhang pagpaling sa uban nga erya sa operasyon aron libugon ang kaaway. Kinahanglan natong anihon ang mga nakab-ot nga kadaugan aron dinaghan nga magrekluta og bag-ong mga Pulang manggugubat, magtukod og mas daghang yunit sa BHB ug konsolidahon ug palaparon ang baseng masa ug mga natarang gerilya.

Hingpit natong patigbabawan ang konserbatibong militar ug paningkamotan nga kanunay'ng kuhaon ang taktikal nga inisyatiba. Purilon nato ug isalikway ang sayop nga mga ideya nga gamot sa maong mga kahuyangan lakip na ang sobra nga pagpanudya sa kusog sa kaaway ug pagpakamenos sa kusog sa asa ug ilang hukbo. Kinahanglan palig-unon ang atong desisyon nga patigbabawan ang kahadlok sa sakripisyo ug pagpangandoy sa kaharuhay.

Kinahanglan kanunay natong likayan ang mga gyera nga wala sa ato ang inisyatiba o bentaha. Pinakamahinungdanon alang sa mga yunit gerilya ang istriktong pagsikreto ug paglihok nga walay patern ug timailhan. Kinahanglan natong patason ang kahimatngon ug pagbantay sa pagpakita-kita sa kaaway, dinanghag nga paglihok ug estilo sa pagtrabaho, sobra ug abusadong paggamit sa mga selpon, tablet ug uban pang himang elektroniko nga bulnerable sa pagsubaybay ug pagmonitor sa kaaway. Kanunay hatagan og makuti nga pagtagad ang pagpugong ug

pagguba sa mga kutay paniktik ug mga espiya sa kaaway.

Armadong propaganda ang tipo sa gimbuhatong masa sa mga natarang gerilya. Ginatibuok kini sa pagpaasdang sa gimbuhatong militar, mga taktikal nga opensiba, pagbatok sa mga opensiba sa kaaway ug pagpataas sa katakus militar sa hukbo ug katawhan pinaagi sa pagtukod og ilang mga yunit alang sa pagpanalipod-sa-kaugalingon ug mga yunit milisyang bayan. Lakip usab dinhi ang padayon ug buhi nga propaganda ug gimbuhatong edukasyon sa han-ay sa masa nga kinahanglan magresulta sa pagtukod og mga sangay sa Partido sa lokalidad ug mga grupo, seksyon komite, organisasyong masa ug organo sa pulitikanhong gahum.

Kinahanglan natong ipataas ang katakus sa lokal nga mga rebolusyonaryong pwersa nga malunsad ang ilang mga gimbuhaton aron malibre ang lokal nga mga yunit sa hukbo gikan sa detalyadong pagdumala ug tagaan kini sila og panahong magkonsentra sa lain laing aspeto sa gimbuhatong militar. Kinahanglan aduna kita'y kusgan nga mga komite sa Partido sa ang-ang sa nataran ug seksyon aron panguluhan ang masa sa ngipon-sa-ngipong pagsukol sa pasistang teror ug pagdumili sa mga baseng operasyon sa kaaway.

Samot pang ginapagilak sa pasistang pagpanumpo ug terorismo ang panginahanglang makumbina ang lain laing tipo ug porma sa organisasyon ug pakigbisog sa masa sa kabanikanhan. Kinahanglan kintang magtukod og tago nga organisasyon aron mamahimong lig-on nga bag-as sa mga pakigbisog sa masa. Kadungan niini, kinahanglan natong agnihon ang masa nga magtukod og mga ligal ug dayag nga mga tipo sa organisasyon, ingonman sa mga tipong tradisyunal ug dependensibo, aron magiit ang ilang ligal ug demokratikong mga katungod ilalum sa reaksyunaryong balaod aron hatagan sila og mas lapad nga maniobrahan sa paglunsad sa ilang mga aktibidad ug pakigbisog. Kina-

hanglan usab nga tukuron, isustine ug palaparon ang mga dinugtugay ug suporta gikan sa mga demokratiko ug maghigalang sektor ug elemento sa mga sentrong urban.

Kinahanglan tibuok-kusog nga hukuman ug batokan ang dinagkong mga pasistang atake batok sa mga sibilyang komunidad nga tipong-SEMPO. Kinahanglang hingpit nga ipakita sa publiko ang mga pasistang krimen. Kinahanglang kuhaon ang simpatya ug suporta sa pinakalapad nga seksyon sa populasyon ug sa mga kusog moimpluwensya sa opinyong publiko. Kinahanglang puntirong, kasuhan ug papanubagon sa ilang mga krimen ug utang nga dugo ang mga tigdisenyo ug tigpatuman sa maong mga kahiwan.

Ang kusog sa BHB ang nag-unang tinubdan sa batakang alyansang mamumuo ug mag-uuma. Kinahanglan padayon natong hatagan og prayoridad ang pagpaasdang sa anti-pyudal nga pakigbisog ug nag-unang mosalig sa kabus nga mag-uuma ug nyutralisahon ang adunahang mag-uuma. Nakighiusa ug nakigtinabangay usab kita sa taas nga saring sa hut-ong mag-uuma, hatungang elemento sa dili-mag-uuma, nalamdagan nga agalong yutaan ug uban pang positibong pwersa ug elemento sa gambalay sa pagtukod og nasudnong nagkahiusang prenteng anti-pasista, anti-pyudal ug anti-imperyalista ug ang pinakalapad nga nagkahiusang prente batok sa pasistang rehimeng US-Duterte.

Kinahanglan usab natong pakusgon ang batakang alyansang mamumuo ug mag-uuma ug ang anti-pyudal nga pakigbisog sa han-ay sa Lumad ug uban pang nasudnong minorya nga may hugot nga koordinasyon sa pagpaasdang sa komprehensibong alyansa ug pakigbisog alang sa katungod sa kaugalingon paghukom ug pagtukod og nasudnong nagkahiusang prente.

Kinahanglan nga paningkamotan ug iasdang ang ligal nga masang pakigbisog sa mga mamumuo, mag-uuma, kabatan-onan ug uban pang demokratikong hut-ong ug sektor sa

mga lungsod. Kinahanglan lig-on nga batokan ang ligal nga demokratikong kalihukan sa pasistang pagpanumpo ug intimidasyon, batokan ang balaod militar ug hulga sa dayag nga pasistang diktadurang paghari, igiit ang ilang mga demokratikong katungod, magpursige sa batakang ligal nga pakigbisog sa mga sentrong urban. Ang mga aktibistang anaa sa hulga nga patyon, kidnap, tortyur ug prisuhon sa mga pasista, kinahanglan nga agnihon nga moanhi na sa kabanikanhan ug mosampa sa BHB.

Kinahanglan palapdon ang nagkahiusang prente batok sa tiranya ni Duterte. Kinahanglan kining makighiusa sa pinakadakung ihap sa mga organisasyon, grupo ug elementong nagabatok sa pagbag-o sa konstitusyon alang sa mini nga pederalismo ug diktadurya, militarismo, pasistang pagpanumpo ug terorismo ni Duterte.

Kinahanglan nga dasig nga ipatuman sa hukbong bayan ang mga tahas nga gisangon kaniya sa Partido. Ang mga kadre nga nangulo sa BHB, katimbang ang mga Pulang kumander ug manggugubat kinahanglan kanunay magpakamaayo sa pagkat-on ug pakutlo sa mga pagtulunan sa pagpatuman sa mga tahas gikan sa usa ka ang-ang ngadto sa mas taas, nga kanunay amgo sa kinatibuk-ang plano.

Sa pagpangulo sa Partido, ang BHB determinado og mas determinado nga labngan ug pildihon ang todong mga opensiba sa kaaway, batokan ang pasistang pagpanamastamas sa rehimeng Duterte ug silutan kini sa tanang mangtas nga krimen batok sa katawhan.

Sa kasamtangang nasudnong kusog ug latag sa BHB, anaa kini sa barug nga iasdang ang gubat sa katawhan sa wala pa naabot nga yugto sa moabot nga tuig. Sa inspirasyon sa mga kadaugan sa ilang hukbo, tibuok ang kagustuhan sa katawhang Pilipino nga iasdang ang nasudnon-demokratikong rebolusyon ug kab-uton ang kadaugan sa umalabot. AB